

158 sem lokið hafa tónlistarkennaraprófi, ganga fyrir í þeim skólum, er hafa sérkennara 1. júní í söng.

4. gr.

Samvinna Tónlistarskólans og Kennaraskólans um sérmenntun söng- og tónlistarkennara skal hagað á þann veg, að Kennaraskólinn veiti kennaranemum Tónlistarskólans kennslu í uppeldisfræði, kennslufræði og heilsufræði. Þar á móti veiti Tónlistarskólinn söngkennaraefnum Kennaraskólans kennslu í tónlist, eftir því sem við verður komið.

5. gr.

Þeir, sem söngkennaraprófi ljúka í Kennaraskólanum, skulu eiga þess kost að ljúka tónlistarkennaraprófi að loknu eins vetrar námi í Tónlistarskólanum, enda séu sömu kröfur til þeirra gerðar og hinna, sem lokið hafa tveggja vetra námi þar.

6. gr.

Reglugerð þessi, sem sett er samkvæmt lögum nr. 16 frá 1947, öðlast þegar gildi.

Í menntamálaráðuneytinu, 1. júní 1959.

Gylfi Þ. Gíslason.

Birgir Thorlacius

159

15. júní

REGLUR

um styrki og námslán til íslenzkra námsmanna erlendis.

Samkvæmt ákvæði í fjárlögum fyrir árið 1959, 14. gr. II. a, skal menntamálaráðuneytið setja reglur um skiptingu á fé því, sem veitt er til styrktar íslenzkum námsmönnum erlendis. Ákveður ráðuneytið hér með, að við úthlutun skuli fylgt eftirfarandi reglum:

1. Árlega skal 5 stúdentum, sem ljúka prófi á því ári og sýnt hafa sérstaka hæfileika til náms, veittur fastur styrkur, að upphæð 20 þúsund krónur. Sá, sem hlýtur slíkan styrk, heldur honum í allt að 5 ár, enda leggi hann árlega fram greinargerð um námsárangur, sem Menntamálaráð tekur gilda. Umsóknir um styrki þessa skulu auglýstar vor hvert að loknu stúdentsprófi, og úthlutar Menntamálaráð styrkjunum fyrir 1. september.

Menntamálaráð setur nánari reglur um styrkveitingar þessar.

2. Íslenzkir námsmenn erlendis, aðrir en stúdentar þeir, sem hlotið hafa fasta styrki, skulu eitt eða tvö fyrstu námsárin fá námslán eingöngu. Við ákvörðun um upphæð námslána skal tekið tillit til mismunandi dvalarkostnaðar í löndunum, þar sem námið er stundað. Þessi regla, um námslán eitt eða tvö fyrstu árin, gildir þó ekki um þá, sem lokið hafa fyrri hluta sérfræðináms hér á landi. Er Menntamálaráði heimilt að veita þeim námsstyrki þegar á fyrsta námsári erlendis.
3. Heimilt er Menntamálaráði að auglýsa og veita sérstök námslán, hærri en hin almennu lán, til að styrkja efnilega nemendur, er leggja vilja stund á þær greinar, sem sérstök þörf er fyrir sérmenntun í.
4. Því fé, sem eigi hefur verið ráðstafað, þá er hinir föstu styrkir og námslán á fyrsta og öðru námsári hafa verið veitt, skiptir Menntamálaráð milli þeirra, sem eru við framhaldsnám. Mega lán og styrkir vera mishá, eftir mikilvægi þess náms, sem lögð er stund á, og eftir dvalarkostnaði í löndum, þar sem námið er

stundað. Styrkir skulu einkum veittir til náms í þeim greinum, sem Menntamálaráð telur þjóðfélaginu nauðsynlegast hverju sinni. Öðrum sé veittur kostur á láni, eftir því sem fjárveiting hrekkur til.

5. Menntamálaráð setur nánari reglur um úthlutun styrkja og lána, eftir því sem þurfa þykir. Skulu þær reglur endurskoðaðar árlega og sendar menntamálaráðuneytinu, áður en úthlutun fer fram.

Menntamálaráðuneytið, 15. júní 1959.

Gylfi P. Gíslason.

Birgir Thorlacius.

REGLUGERÐ

um barnavernd í Siglufirði.

160

21. ágúst

1. gr.

Í umdæmi barnaverndarnefndar Siglufjarðar er börnum yngri en 12 ára eigi leyfilegt að vera á almannaferi eftir kl. 20, á tímabilinu frá 1. september til 1. maí, og ekki síðar en kl. 22 á öðrum tíma árs, nema í fylgd forsjármanns.

Börn á aldrinum 12—14 ára mega eigi vera á almannaferi eftir kl. 21, á tímabilinu 1. september til 1. maí, nema þau séu í fylgd forsjármanns, séu í atvinnu eða öðrum nauðsynlegum erindagerðum, að dómi barnaverndarnefndar. Á tímabilinu 1. maí til 1. sept. skulu unglingar á þeim aldri eigi vera á almannaferi eftir kl. 23, nema með þeim takmörkunum, sem að framan greinir.

Foreldrar og aðrir forráðamenn barna skulu sjá um, að viðlagðri ábyrgð, að ákvæðum þessum sé framfylgt.

2. gr.

Bannað er að selja eða gefa börnum og unglingum innan 14 ára aldurs tóbak eða stuðla að því, að þau neyti þess eða hafi það um hönd.

3. gr.

Barnaverndarnefnd skal kynna sér kvikmyndir, leiksýningar og aðrar opinberar sýningar. Telji nefndin sýningu skaðlega eða óholla sálarlífi barna og unglinga, getur hún bannað þeim aðgang að henni. Unglingum innan 14 ára aldurs er óheimill aðgangur að opinberum kvikmyndasýningum, leiksýningum eða öðrum sýningum, er hefjast kl. 20 eða síðar, á tímabilinu 1. september til 1. maí, nema í fylgd forsjármanns, enda sé myndin eða sýningin eigi bönnuð unglingum af öðrum ástæðum.

4. gr.

Unglingum innan 16 ára aldurs er óheimill aðgangur að opinberum dansleikjum. Undanskildir eru þó dansleikir, sem sérstaklega eru ætlaðir börnum og unglingum, svo sem jólatrésfagnaðir og dansleikir skóla.

5. gr.

Börnum og unglingum innan 14 ára aldurs er óheimill aðgangur að knattborðstofum og öldrykkjustofum. Einnig er þeim óheimill aðgangur að almennum kaffistofum eftir kl. 20. Sama gildir um ís- og sælgætissölur.

Þeir, sem reka slík fyrirtæki, sem í fyrstu málsgrein getur, svo og þeir, sem leyfi hafa til dansleikjahalds, skulu sjá um, að börn fái þar eigi aðgang.

160 Óheimilt er þeim, sem fást við veitingasölu eða hliðstæðan rekstur að ráða í
21. ágúst þjónustu sín börn innan 16 ára aldurs. Til þess að ráða börn innan 16 ára aldurs til annarra verzlunarstarfa, þarf leyfi foreldra eða forráðamanna barnanna. Barnaverndarnefnd er heimilt að ganga úr skugga um, að slíkt leyfi foreldra sé fyrir hendi. Barnaverndarnefnd er heimilt, þótt leyfi foreldra sé fyrir hendi, að stöðva slíka atvinnu unglunga, ef nefndarmönnum þykir sýnt, að velferð þeirra sé í hættu eða að starfið hafi óheillavænleg áhrif á þá.

6. gr.

Óheimilt er börnum og unglungum innan 16 ára aldurs að fara um borð eða hafast við í skipum, nema í fylgd foreldra eða forsjármanns. Barnaverndarnefnd getur þó veitt undanþágu, ef um uppskipun eða atvinnu við útveg er að ræða.

7. gr.

Barnaverndarnefnd er heimilt að ákveða, að unglingar, 12—16 ára að aldri, skuli bera aldursskírteini.

8. gr.

Um brot á reglugerð þessari og viðurlög við þeim skal fara samkvæmt ákvæðum barnaverndarlaga.

9. gr.

Reglugerð þessi, sem sett er samkvæmt lögum nr. 29/1947, öðlast þegar gildi.

Í menntamálaráðuneytinu, 21. ágúst 1959.

Gylfi Þ. Gíslason.

Birgir Thorlacius.

161

21. sept.

HAFNARREGLUGERÐ

fyrir Patrekshöfn.

I. KAFLI

Takmörk hafnarinnar og stjórn.

1. gr.

Patrekshöfn takmarkast annars vegar af strandlengjunni á milli Yxnhamars og Þúfneyrarodda og hins vegar af miðjum Patreksfirði, undan sömu stöðum.

2. gr.

Hreppsnefnd Patrekshrepps hefur á hendi stjórn hafnarmálanna, undir yfirstjórn þess ráðuneytis, sem fer með hafnarmál hverju sinni.

Hver nýkjörin hreppsnefnd kys á fyrsta fundi sínum, til fjögurra ára í senn, þrjá menn í hafnarnefnd og ákveður jafnframt formann hennar.

Hafnarnefnd hefur á hendi framkvæmd hafnarmála og eftirlit með höfninni, sér um viðhald og endurbætur á höfninni, stýrir öllum framkvæmdum, er þar að lúta, annast bókhald og fjárhald hafnarinnar og öll reikningsskil, svo framarlega, sem hreppsnefnd ákveður ekki aðra skipan. Reikningar hafnarsjóðs skulu fylgja hreppsreikningum og endurskoðast ásamt þeim.